

SLUŽBENI LIST

REPUBLIKE BOSNE I HERCEGOVINE



СЛУЖБЕНИ ЛИСТ

РЕПУБЛИКЕ БОСНЕ И ХЕРЦЕГОВИНЕ

Godina IV - Broj 11

Nedjelja, 9. aprila/travnja 1995.
SARAJEVO

Akontacija pretplate
se utvrđuje
kvartalno

143

Na osnovu čl. 82, 90. i 91. Zakona o redovnim sudovima ("Službeni list SRBiH", br. 19/86, 25/88 i 33/89 i "Službeni list RBiH", br. 6/92, 11/92, 19/93 i 13/94), Skupština Republike Bosne i Hercegovine na sjednici održanoj 29. marta 1995. godine, donijela je

ODLUKU

O RAZRJEŠENJU I IZBORU PREDSEDNIKA I SUDIJA REDOVNIH SUDOVA

I

Razrješava se dužnosti sudije Vrhovnog suda Bosne i Hercegovine MEHMED ŠATOR, na lični zahtjev, radi odlaska na drugu dužnost.

II

Razrješava se dužnosti predsjednik Višeg suda u Sarajevu MUAMER HERCEGLIJA, radi odlaska na drugu dužnost.

III

Razrješava se dužnosti sudije u Višem sudu u Sarajevu AZRA OMERAGIĆ, radi odlaska na drugu dužnost.

IV

Razrješava se dužnosti sudije u Osnovnom sudu u Tuzli ZLATKO GARIĆ, radi odlaska na drugu dužnost.

V

Razrješava se dužnosti predsjednik suda u Osnovnom sudu u Bugojnu BRANKA RAGUZ, radi odlaska na drugu dužnost.

VI

Za predsjednika Višeg suda u Sarajevu izabrana je AZRA OMERAGIĆ.

VII

Za sudiju Višeg suda u Sarajevu izabrana je ZINAIDA PAŠALIĆ.

VIII

Za sudiju Osnovnog suda u Tuzli izabrana je SMILJANA PAVLJEŠEVIĆ-LEKIĆ.

IX

Odluku objaviti u "Službenom listu RBiH".

S broj 226
29. marta 1995. godine
Sarajevo

Predsjednik
Skupštine RBiH,
Miro Lazović, s. r.

144

Na osnovu čl. 27. i 33. Zakona o javnom tužilaštvu ("Službeni list SRBiH", br. 19/86, 25/88 i 33/89 i "Službeni list RBiH", br. 6/92, 9/92, 21/92, 19/93 i 13/94), Skupština Republike Bosne i Hercegovine na sjednici održanoj 29. marta 1995. godine, donijela je

ODLUKU

O RAZRJEŠENJU ZAMJENIKA REPUBLIČKOG JAVNOG TUŽIOCA I IMENOVANJU ZAMJENIKA OSNOVNIH JAVNIH TUŽILACA

I

Razrješava se dužnosti zamjenika republičkog javnog tužioca u Republičkom javnom tužilaštvu DANICA PRIMO-RAC sa 31. martom 1995. godine, radi ostvarivanja prava na penziju.

II

Za zamjenika osnovnog javnog tužioca u Osnovnom javnom tužilaštvu u Gradačcu imenovan je NIZAM ŠARIĆ.

III

Za zamjenike osnovnog javnog tužioca u Osnovnom javnom tužilaštvu u Tuzli imenovani su MIRSADA KALABA i KENAN BALIĆ.

IV

Za zamjenika osnovnog javnog tužioca u Osnovnom javnom tužilaštvu u Zavidovićima imenovana je DŽEMANINA MEMAGIĆ.

V

Odluku objaviti u "Službenom listu RBiH".

S broj 227
29. marta 1995. godine
Sarajevo

Predsjednik
Skupštine RBiH,
Miro Lazović, s. r.

145

Na osnovu člana 20. Zakona o okružnim vojnim sudovima ("Službeni list RBiH", br. 12/92, 21/92, 23/92, 17/93, 22/93, 13/94, 28/94 i 33/94), na prijedlog ministra pravde, Skupština Republike Bosne i Hercegovine na sjednici održanoj 29. marta 1995. godine, donijela je

ODLUKU

O IZBORU SUDIJA U OKRUŽNIM VOJNIM SUDOVIMA

I

Za sudiju Okružnog vojnog suda u Zenici izabran je ALAU-DIN MEŠETOVIĆ, sada pripadnik Armije RBiH.

II

Za sudiju Okružnog vojnog suda u Tuzli izabran je ZLATKO GARIĆ, sada sudija u Osnovnom sudu u Tuzli.

III

Ministarstvo pravde regulisat će statusna i druga pitanja izabranih sudija okružnih vojnih sudova.

IV

Odluku objaviti u "Službenom listu RBiH".

S broj 228
29. marta 1995. godine
Sarajevo

Predsjednik
Skupštine RBiH,
Miro Lazović, s. r.

146

Na osnovu Amandmana LI tačka 5. stav 3. na Ustav Republike Bosne i Hercegovine, Skupština Republike Bosne i Hercegovine na sjednici Skupštine, održanoj 29. marta 1995. godine, donijela je

ODLUKU

O POTVRDIVANJU ODLUKA KAO OPŠTIH AKATA
KOJE JE PREDSEDNIŠTVO RBiH DONIJELO U
FUNKCIJI SKUPŠTINE RBiH

Član 1.

Potvrđuje se Odluka o podnošenju zahtjeva za prijem Skupštine Republike Bosne i Hercegovine u članstvo Interparlamentarne unije, koju je Predsjedništvo Republike Bosne i Hercegovine donijelo na 263. sjednici, održanoj 12. septembra 1994. godine u funkciji Skupštine RBiH na osnovu Amandmana LI tačka 5. stav 3. na Ustav Republike Bosne i Hercegovine.

Član 2.

Potvrđuju se Pravila Bosansko-hercegovačke grupe u Interparlamentarnoj uniji, koja je Predsjedništvo Republike Bosne i Hercegovine donijelo na 263. sjednici održanoj 12. septembra 1994. godine u funkciji Skupštine RBiH na osnovu Amandmana LI tačka 5. stav 3. na Ustav Republike Bosne i Hercegovine.

Član 3.

Ova odluka stupa na snagu narednog dana od dana objavljivanja u "Službenom listu RBiH".

S broj 229
29. marta 1995. godine
Sarajevo

Predsjednik
Skupštine RBiH,
Miro Lazović, s. r.

147

Na osnovu člana 304. stav 1. tačka 24. Ustava Republike Bosne i Hercegovine, a u vezi sa članom 154. stav 2. Poslovnika Skupštine Republike Bosne i Hercegovine - Prečišćeni tekst ("Službeni list RBiH", broj 30/94), Skupština Republike Bosne i Hercegovine na sjednici održanoj 29. marta 1995. godine, donosi

ODLUKU

O OSNIVANJU INTERPARLAMENTARNE GRUPE
BOSNE I HERCEGOVINE I O IMENOVANJU
FUNKCIONERA U INTRAPARLAMENTARNOJ GRUPI
BOSNE I HERCEGOVINE

Član 1.

Osniva se Interparlamentarna grupa Bosne i Hercegovine u Interparlamentarnoj uniji (u daljem tekstu: BH Grupa) koju čine svi poslanici u Skupštini Republike Bosne i Hercegovine (u daljem tekstu: Skupština) izabrani na neposrednim, tajnim višestranačkim izborima 1990. godine, čiji je mandat još uvijek važeći.

Član 2.

Listu BH Grupe utvrđuje generalni sekretar BH Grupe.

Član 3.

Pravila BH Grupe u Interparlamentarnoj uniji može da utvrđuje za vrijeme ratnog stanja Predsjedništvo Republike Bosne i Hercegovine u funkciji Skupštine ako se Skupština ne može da sastane i radi u sjednici.

Član 4.

BH Grupa ima predsjednika, Izvršni komitet i dva člana u Savjetu Interparlamentarne unije.

Član 5.

Za predsjednika BH Grupe imenuje se prof. dr ABDULAH KONJICIJA, predsjednik Vijeća građana Skupštine.

Član 6.

Izvršni komitet BH Grupe čine:

1. Prof. dr ABDULAH KONJICIJA, predsjednik-poslanik Stranke demokratske akcije,
2. MARIOFIL LJUBIĆ, potpredsjednik-poslanik Hrvatske demokratske zajednice,
3. MUSTAFA PAMUK, blagajnik-poslanik Stranke demokratske akcije,
4. AHMAD ALIČIĆ, član-poslanik Stranke demokratske akcije,
5. RASIM KADIĆ, član-poslanik Liberalne stranke,
6. MILE KUDIĆ, član-poslanik Hrvatske demokratske zajednice,
7. MIRO LAZOVIĆ, član-poslanik Socijal demokratske partije,
8. MIRZA MUJADŽIĆ, član-poslanik Stranke demokratske akcije,
9. Dr VLADO PANDŽIĆ, član-poslanik Hrvatske demokratske zajednice,
10. LUKA RADOŠ, član-poslanik Unije bosanskohercegovačkih socijal demokrata,
11. TARIK REŠIDBEGOVIĆ, član-poslanik Stranke demokratske akcije.

Član 7.

U savjet Interparlamentarne unije imenuju se članovi BH Grupe:

1. Prof. dr KASIM BEGIĆ, predsjednik Zakonodavno-pravne komisije Skupštine-nezavisni poslanik,
2. MARIOFIL LJUBIĆ, potpredsjednik Skupštine-poslanik Hrvatske demokratske zajednice.

Član 8.

Generalni sekretar Skupštine, AVDO ČAMPARA, je generalni sekretar BH Grupe.

Član 9.

Za administrativnog sekretara BH Grupe imenuje se mr. MIRSAD SELIMOVIC, sekretar Komisije Skupštine za odnose sa inostranstvom.

Član 10.

Ova odluka stupa na snagu osmog dana od dana objavljivanja u "Službenom listu RBiH" i dostavit će se Generalnom sekretaru Interparlamentarne unije u Ženevi.

S broj 230
29. marta 1995. godine
Sarajevo

Predsjednik
Skupštine RBiH,
Miro Lazović, s. r.

148

Na osnovu člana 304. stav 1. tačka 7. Ustava Republike Bosne i Hercegovine i Amandmana LXXI tačka 5. na Ustav Republike Bosne i Hercegovine, Skupština Republike Bosne i Hercegovine na sjednici održanoj 29. marta 1995. godine, donijela je

ODLUKU

O CILJEVIMA I ZADACIMA DEVIZNE POLITIKE I PROJEKCIJI PLATNOG BILANSA U 1995. GODINI

1. U skladu sa mjerama utvrdene ekonomske politike, ovom odlukom se bliže utvrđuju osnovni ciljevi i prioritetni zadaci devizne politike u 1995. godini koji se tiču naročito:

- podsticanja spoljno-trgovinskih transakcija, roba i usluga,
- stabilnog deviznog kursa,
- kontinuiranog povećanja i racionalnog korištenja deviznih rezervi Republike Bosne i Hercegovine (u daljem tekstu: Republika),
- uspostavljanja i unapređenja odnosa sa međunarodnim finansijskim institucijama, a posebno Međunarodnim monetarnim fondom i Svjetskom bankom,
- konsolidacije inostranog zaduženja Republike,
- regulisanje unutrašnjeg deviznog duga Republike i
- projekcija platnog bilansa.

2. Obzirom na postavljene ciljeve ekonomske politike, a prvenstveno ciljeve obezbjeđenja minimalnih egzistencijalnih uslova stanovništva, jačanja odbrambene sposobnosti Republike, održanja određenog nivoa proizvodnje, unapređenja proizvodnje poljoprivredno-prehrambenih proizvoda te, obnove privrednih kapaciteta kontuirano će se preduzimati i analizirati mjere za povećanje izvoza roba i usluga, te efektuiranje deviznih priliva po ovim osnovama.

Kroz odgovarajuće disponiranje deviznim sredstvima će se uticati na postizanje optimalne strukture uvoza roba i usluga, prije svega, u skladu sa iskazanim potrebama nesmetanog funkcionisanja privrednog sistema.

3. U cilju intenziviranja deviznog priliva, ne gubeći iz vida oskudnu ponudu roba na domaćem tržištu, te u neophodnom obimu zadovoljavanja domaćih potreba, bitan zadatak je i horizontalno i vertikalno proširivanje našeg tržišnog učešća na pojedinim segmentima svjetskog tržišta. Ovo se posebno odnosi na oblast pružanja usluga u izvođenju investicionih radova u inostranstvu.

4. U skladu sa navedenim, u tač. 2. i 3. ove odluke prioritete u plaćanjima prema inostranstvu imaće obezbjeđenje neophodnih finalnih proizvoda za zadovoljenje potreba prvog stepena nužnosti, reprodukcioni materijala, rezervnih dijelova i energenata.

U cilju efikasnijeg usklađivanja strukture uvoza i potrošnje, a u skladu sa svojim ovlaštenjima Vlada Republike Bosne i Hercegovine (u daljem tekstu: Vlada) može utvrditi odgovarajuće režime uvoza i izvoza i u saradnji sa drugim nadležnim organima preduzimati ostale bitne mjere na stvaranju uslova za, u datim uslovima, što efikasnije obavljanje robno-novčanog prometa i prometa usluga.

5. Narodna banka Bosne i Hercegovine (u daljem tekstu: Narodna banka) će i dalje dosljedno, u skladu sa procijenjenim nivoom ponude i potražnje domaćih i inostranih sredstava plaćanja insistirati na formiranju i održavanju realnog i stabilnog deviznog kursa.

6. U skladu sa kretanjima u prvom tromjesečju, ukoliko se za to steknu uslovi, obezbjedit će se i formalno-pravni te institucionalni okviri za aktivniji uticaj sistema deviznog tržišta na formiranje deviznog kursa. U ovom smislu, a u cilju otklanjanja poremećaja na deviznom tržištu Narodna banka će jasno definisati vlastite vidove nastupa i svoju interventnu ulogu.

7. Narodna banka će nastojati da ubrza i pospješi pozitivne tendencije u formiranju deviznih rezervi Republike, kao važnog elementa inostrane likvidnosti zemlje. Sprovodit će se pooštrena kontrola disponiranja tekućim deviznim rezervama od strane banaka, u cilju dosljednog poštovanja zakonitosti njihove upotrebe. Stalne devizne rezerve, kojima disponira Narodna banka, biće stavljene u funkciju, prije svega, očuvanja stabilne vrijednosti i afirmacije dinara, ali i ostvarenja osnovnih bitnih ciljeva Programa ekonomske politike. U skladu sa ovim sredstva deviznih rezervi kojima rukuje Narodna banka mogu biti korištena za intervencije na deviznom tržištu. Radi pozitivnog uticaja na stabilnost i kvalitet deviznih rezervi, te omogućavanja našeg aktivnijeg uključivanja u međunarodno devizno tržište i ostvarivanje značajnih prihoda po ovom osnovu, neophodno je, zajedno sa nadležnim ministarstvima izvršiti preusmjerenje svih deviznih tokova na Narodnu banku.

8. Jedan od prioritetnih zadataka devizne politike u 1995. godini je i uspostavljanje čvrstih odnosa i članstva u međunarodnim finansijskim institucijama, prije svega, sa Međunarodnim monetarnim fondom i Svjetskom bankom. Prioritetnost ovog zadatka proizilazi iz činjenice da kvalitetna konsolidacija inostranog zaduženja Republike, prije svega, zavisi od članstva u ove dvije institucije, regulisanja finansijskih obaveza, te ulaska u određene finansijske aranžmane sa njima.

9. Narodna banka će intenzivirati aktivnosti na otkupu dijela ukupnog kreditnog zaduženja prema inostranstvu, s tim da se prethodno moraju formirati izvori sredstava za otkup dijela ino-zaduženja koji je za to podoban.

10. Deponovana devizna štednja građana trajno će se riješiti donošenjem zakona o javnom dugu Republike do kraja prvog polugodišta 1995. godine.

11. Narodna banka će u saradnji sa državnim direkcijom za poslove sukcesije izraditi sveobuhvatan pristup analizi aktivne i pasive bilansa Narodne banke ex Jugoslavije, a u skladu sa definisanim principima i stavovima usvojenim od strane Vlade, raditi na dogradnji i unapređenju strategije Republike u procesu sukcesije ex Jugoslavije.

12. Shvatajući važnost problema naplate dospelih potraživanja poslovnih subjekata Republike prema inostranstvu, aktivnosti na tome biće intenzivirane.

U cilju omogućavanja što efikasnijeg nastupa domaćih poslovnih subjekata na inostranim tržištima, Narodna banka će ispitati mogućnosti i forme njenog, kao i angažovanja cjelokupnog bankarskog sistema na adekvatnoj kreditno-garancijskoj podršci. U tom smislu biće predložena određena zakonska rješenja.

U domenu platnog prometa sa inostranstvom detaljno će biti razmotrena racionalnost korespondentske i kontokorentne mreže banaka sa inostranstvom, sa stanovišta momentalnih i potencijalnih potreba. U tom smislu sagledat će se potreba racionalnog širenja korespondentske i kontokorentne mreže sa inostranim bankama, prema u ekonomskom smislu, atraktivnim regionima.

U ovom smislu stvarat će se bankarski infrastrukturni preduslovi za nesmetan prijem organizovanog pricicanja svih vidova priliva deviznih sredstava od strane pravnih i fizičkih lica iz inostranstva.

Narodna banka će u saradnji sa nadležnim ministarstvom razmotriti mogućnosti i forme eventualne intenzivnije i efikasnije upotrebe deviznog potencijala formiranog u domaćem platnom prometu u devizama.

13. Sastavni dio ove odluke je i projekcija platnog bilansa Republike za 1995. godinu.

**PROJEKCIJA
PLATNOG BILANSA REPUBLIKE BOSNE I
HERCEGOVINE U 1995. GODINI**

- u milionima USA dolara -

Redni broj	OSNOV	Iznos
I	SALDO TEKUĆIH TRANSAKCIJA	176,0
1.	Saldo robne razmjene	- 157,0
1.1.	Izvoz robe	119,0
1.2.	Uvoz robe	276,0
2.	Saldo usluga	65,0
2.1.	Priliv	128,0
2.2.	Odliv	63,0
3.	Saldo robe i usluga	- 92,0
3.1.	Priliv	247,0
3.2.	Odliv	339,0
4.	Saldo jednost. transfera	160,0
4.1.	Priliv	228,0
4.2.	Odliv	68,0
5.	Saldo ostalog nerobnog prometa	45,0
5.1.	Priliv	120,0
5.2.	Odliv	75,0
6.	Saldo kamata	-
6.1.	Naplaćene kamate	-
6.2.	Plaćene kamate	-
7.	Ukupan priliv	595,0
8.	Ukupan odliv	419,0
9.	Saldo priliva i odliva	176,0
II	SALDO KRED.-FIN. TRAN.	10,0
III	DEVIZNE REZERVE	150,0

14. Vlada u skladu sa svojim ovlaštenjima može donijeti bliže propise i utvrditi druge mjere na provođenju ciljeva i zadataka utvrđenih ovom odlukom i projekcijom platnog bilansa.

15. Ova odluka stupa na snagu danom objavljivanja u "Službenom listu RBiH", a primjenjivat će se od 1. januara 1995. godine.

S broj 231
29. marta 1995. godine
Sarajevo

Predsjednik
Skupštine RBiH,
Miro Lazović, s. r.

149

Na osnovu člana 304. stav 1. tačka 7. Ustava Republike Bosne i Hercegovine i Amandmana LXXI tačka 5. na Ustav Republike Bosne i Hercegovine, Skupština Republike Bosne i Hercegovine na sjednici održanoj 29. marta 1995. godine, donijela je

ODLUKU O CILJEVIMA I ZADACIMA MONETARNO- KREDITNE POLITIKE U 1995. GODINI

1. U skladu sa mjerama utvrđene ekonomske politike, ovom odlukom se bliže utvrđuju ciljevi i zadaci monetarno-kreditne politike u 1995. godini.

2. Zajedno sa drugim mjerama makro ekonomske politike, posebno mjerama fiskalne i devizne politike, monetarno-kreditnom politikom će se podržavati oživljavanje privrede, dalja afirmacija i zaštita dinara i održavanje njegove stabilne vrijednosti.

3. Dinar kao platežno sredstvo će se uvesti i dalje afirmisati na cijeloj teritoriji Republike Bosne i Hercegovine (u daljem tekstu: Republika) i postepeno povećavati njegovo učešće u ukupnom platnom prometu u odnosu na učešće stranih sredstava plaćanja.

4. Stalno će se stvarati uslovi da se monetarno-kreditna politika provodi centralizovano i na jedinstven način na cjelokupnoj teritoriji Republike. Kontrolni organi Narodne banke Bosne i Hercegovine (u daljem tekstu: Narodna banka), Službe društvenog knjigovodstva i Ministarstva finansija, kao i drugi odgovarajući inspekcijski i kontrolni organi će permanentno kontrolisati koliko i kako se koristi dinar u platnom prometu i obračunskom sistemu i preduzimati potrebne mjere da se ciljevi i zadaci utvrđeni ovom odlukom što uspješnije realizuju.

5. U ostvarivanju ciljeva i zadataka ekonomske politike vodiće se restriktivna monetarno-kreditna politika, tako da stopa rasta novčane mase bude relativno niža od stope rasta nominalnog društvenog proizvoda. Projekcijom monetarno-kreditne politike i efikasnom primjenom instrumenata monetarno-kreditnog regulisanja, Narodna banka će u skladu sa svojim zakonskim ovlaštenjima bliže utvrditi mogući rast novčane mase i drugih monetarno-kreditnih agregata.

6. U okviru ostvarivanja ciljeva i zadataka iz tač. 2. i 5. ove odluke Narodna banka će regulisati obim ponude i tražnje novca i kratkoročnih vrijednosnih papira na tržištu novca, tako što će kupovati i prodavati kratkoročne vrijednosne papire, kao i kupovati i stvarati uslove da prodaje strana sredstva plaćanja.

7. Narodna banka će koristiti primarnu emisiju za kupovinu stranih sredstava plaćanja radi formiranja deviznih rezervi Republike kojima rukuje Narodna banka i za avansiranje banaka koje kupuju strana sredstva plaćanja u skladu sa odlukom Narodne banke o mjenjačkim poslovima.

Radi vođenja politike stabilnog deviznog kursa i uticaja na stabilnost ukupnih privrednih tokova, Narodna banka može koristiti sredstva deviznih rezervi iz stava 1. ove tačke i za intervencije na deviznom tržištu.

8. Na osnovu određenih vrijednosnih papira i određenih isprava o datim kratkoročnim kreditima za proizvodnju, zalihe i rezerve osnovnih poljoprivredno-prehrambenih proizvoda i za izvoz robe i usluga, uključivo i pripremu robe i usluga za izvoz, likvidne i kreditno sposobne banke mogu koristiti kratkoročne kredite za refinansiranje iz primarne emisije kod Narodne banke.

Kratkoročne kredite za refinansiranje iz stava 1. ove tačke banke mogu koristiti najviše do jedne trećine datih kredita za navedene namjene.

Za ostale namjene Narodna banka neće odobravati kredite iz primarne emisije.

Listu osnovnih poljoprivredno-prehrambenih proizvoda iz stava 1. ove tačke utvrdiće Narodna banka na prijedlog ministarstva nadležnog za poljoprivredu.

Visinu, rokove korištenja i vraćanja, kao i druge uslove za davanje kratkoročnih kredita bankama za namjene iz stava 1. ove tačke propisuje Narodna banka posebnom odlukom.

9. Narodna banka i banke neće odobravati kredite za finansiranje javne potrošnje.

Radi premoštavanja vremenske neusklađenosti između pritičanja prihoda i izvršavanja rashoda republičkog budžeta, Narodna banka može izuzetno odobravati kratkoročne kredite Republici.

Kratkoročni krediti iz stava 2. ove tačke mogu se odobriti najviše do 10% planiranih rashoda republičkog budžeta sa krajnjim rokom dospjeća 31. decembra 1995. godine.

10. Narodna banka će politikom opšte eskontne stope i kamatnih stopa uticati na usporavanje rasta inflacije i podržati angažovanje kreditnog potencijala banaka na oživljavanju privrede, a naročito na sektoru izvoza i proizvodnje osnovnih poljoprivredno-prehrambenih proizvoda.

Zavisno od stabilnosti deviznog kursa i cijena vršit će se smanjenje opšte eskontne stope i kamatnih stopa Narodne banke.

Kamatne stope za kratkoročno kreditiranje namjena iz tačke 8. ove odluke utvrdiva će se na nižem nivou od opšte eskontne stope.

11. Kamatne stope banaka će se formirati u skladu sa datim uslovima ponude i tražnje novca i vrijednosnih papira na tržištu uz praćenje važeće eskontne stope Narodne banke.

Na dio kratkoročnih kredita koji se refinansiraju putem primarne emisije, banke mogu utvrđivati kamatnu stopu do 1% veću od kamatne stope Narodne banke.

12. Deponovana devizna štednja građana trajno će se riješiti donošenjem zakona o javnom dugu Republike do kraja prvog polugodišta 1995. godine.

13. Ova odluka stupa na snagu danom objavljivanja u "Službenom listu RBiH", a primjenjivat će se od 1. januara 1995. godine.

S broj 232
29. marta 1995. godine
Sarajevo

Predsjednik
Skupštine RBiH,
Miro Lazović, s. r.

150

Na osnovu člana 35. stav 2. Uredbe sa zakonskom snagom o carinskom zakonu ("Službeni list RBiH", broj 5/95), Vlada Republike Bosne i Hercegovine, donosi

ODLUKU

O ODREĐIVANJU ROBE NA KOJU SE NE PLAĆA NAKNADA ZA CARINSKO EVIDENTIRANJE

I

Naknada za carinsko evidentiranje u visini od 1% od carinske osnovice, ne plaća se na robu koja se uvozi, unosi ili prima (u daljem tekstu: uvozi) na carinsko područje Republike Bosne i Hercegovine, a koja je oslobođena od plaćanja carine po čl. 24, 25, 26, 27, 28, 54. i 59. Uredbe sa zakonskom snagom o carinskom zakonu ("Službeni list RBiH", broj 5/95).

II

Na robu koja se uvozi po osnovu članova navedenih u tački I ove odluke, a za koje se carina plaća po nižoj stopi u odnosu na stopu propisanu Uredbom sa zakonskom snagom o carinskoj tarifi ("Službeni list RBiH", broj 5/95) plaća se naknada za carinsko evidentiranje u visini od 1% od carinske osnovice.

III

Naknada za carinsko evidentiranje obračunava se i naplaćuje u valuti i po propisima za naplatu carine.

IV

Ova odluka stupa na snagu danom objavljivanja u "Službenom listu RBiH".

V broj 48/95
4. aprila 1995. godine
Sarajevo

Predsjednik
Vlade RBiH,
dr Haris Silajdžić, s. r.

151

Na osnovu člana 32. Uredbe sa zakonskom snagom o posebnom porezu na promet proizvoda i usluga ("Službeni list RBiH", broj 5/95), Vlada Republike Bosne i Hercegovine, donosi

ODLUKU

O VISINI KAMATE NA IZNOS POREZA NA PROMET PROIZVODA I USLUGA KOJI NIJE PLAĆEN U PROPISANOM ROKU

I

Na iznos poreza na promet proizvoda i usluga i iznos posebnog poreza na promet pojedinih proizvoda, koji nije plaćen u propisanom roku plaća se kamata po stopi od 1% za svaki dan zakašnjenja.

II

Kamata iz tačke 1. ove odluke plaća se u valuti u kojoj se plaća porez.

III

Ova odluka stupa na snagu danom objavljivanja u "Službenom listu RBiH".

V broj 51/95
4. aprila 1995. godine
Sarajevo

Predsjednik
Vlade RBiH,
dr Haris Silajdžić, s. r.

152

Na osnovu člana 248. Uredbe sa zakonskom snagom o carinskom zakonu ("Službeni list RBiH", broj 5/95), Vlada Republike Bosne i Hercegovine, donosi

ODLUKU

O VISINI KAMATE NA IZNOS CARINE I DRUGIH UVOZNIH DAŽBINA KOJE NISU PLAĆENE U PROPISANOM ROKU

I

Na iznos carine i drugih uvoznih dažbina koje nisu plaćene u zakonom propisanom roku plaća se kamata po stopi od 1% za svaki dan zakašnjenja.

Smatra se da carina i uvozne dažbine nisu plaćene u propisanom roku kada nisu uplaćene na propisani račun.

II

Kamata iz tačke 1. ove odluke plaća se u valuti u kojoj se plaća carina, odnosno uvozne dažbine.

III

Ova odluka stupa na snagu danom objavljivanja u "Službenom listu RBiH".

V broj 52/95
4. aprila 1995. godine
Sarajevo

Predsjednik
Vlade RBiH,
dr Haris Silajdžić, s. r.

153

Na osnovu člana 67. Zakona o unutrašnjem platnom prometu ("Službeni list RBiH", broj 5/95), ministar finansija, donosi

RJEŠENJE

O VRSTAMA ROBA I USLUGA KOJE SE NE MOGU PRODAVATI ZA STRANA SREDSTVA PLAĆANJA

1. Javna preduzeća mogu prihode ostvariti u stranim sredstvima plaćanja od pravnih i fizičkih lica - samostalnih privrednika koja svoje prihode ostvaruju u stranim sredstvima plaćanja.

2. Preduzeća od posebnog interesa za Republiku Bosnu i Hercegovinu mogu prihode ostvarivati u stranim sredstvima plaćanja od pravnih i fizičkih lica - samostalnih privrednika koja svoje prihode ostvaruju u stranim sredstvima plaćanja.

3. Izuzetno od tač. 1. i 2. ovog rješenja javna preduzeća i preduzeća od posebnog interesa za Republiku Bosnu i Hercegovinu, određene robe i usluge ne mogu naplaćivati u stranim sredstvima plaćanja niti ostvarivati prihode od prodaje tih roba i usluga, što se utvrđuje ovim rješenjem.

4. Robe koje se ne mogu prodavati za strana sredstva plaćanja:

1) hljeb, so i druge poljoprivredno-prehrambene robe domaće proizvodnje;

2) robe koje se prodaju putem Direkcije za robne rezerve;

3) sredstva za održavanje higijene (sapun toaletni, sapun za pranje rublja, deterdženti za pranje rublja i posuda) domaće proizvodnje;

4) lijekovi za hronične bolesnike, zarazne bolesti, bolesti djece, vakcine, analgetici, antipiretici, dječija hrana i oprema za novorođenčad;

5) udžbenici, propisana lektira i knjige za učenike, studente i biblioteke, školski pribor za učenike, studente i javne ustanove, obrasci osim pasoša, vozačkih i saobraćajnih dozvola, evidencione knjige, školski namještaj i učila, materijal i sredstva za izvođenje nastave i dnevna štampa;

6) službena glasila, za državne i opštinske organe koji se finansiraju iz budžeta društveno-političkih zajednica, a ostala pravna lica po dogovoru;

7) električna energija, ogrijevno drvo, sve vrste uglja i zemni gas za domaćinstva i pravna lica koja se finansiraju iz budžeta društveno-političkih zajednica.

5. Usluge koje se ne mogu naplaćivati u stranim sredstvima plaćanja su:

1) usluge javnih i komunalnih preduzeća za građane i ustanove;

2) usluge prometa i komunikacija i to:

- telefonska pretplata i razgovori unutar zemlje;

- usluge unutrašnjeg poštanskog prometa;

- televizijska pretplata za pravna i fizička lica;

- stanične usluge u unutrašnjem javnom prometu;

- usluge prijevoza u javnom gradskom prometu koja vrše javna preduzeća;

3) usluge javnih ustanova u oblasti društvenih djelatnosti;

4) provizija Narodne banke Bosne i Hercegovine za poslove u zemlji, izuzev stvarnih troškova po pitanju transfera novca, konverzije valuta i zamjene pohabanih novčanica;

5) provizija Zavoda za platni promet za poslove dinarskog platnog prometa.

6. Preduzeća koja prodajom roba i usluga u skladu sa tač. 4. i 5. ovog rješenja ostvare gubitak mogu ostvariti pravo na naknadu iz republičkog budžeta u skladu sa odgovarajućim propisom.

7. Za neprovođenje radnji iz ovog rješenja primjenjivat će se kaznene odredbe utvrđene u Zakonu o unutrašnjem platnom prometu ("Službeni list RBiH", broj 5/95).

8. Stupanjem na snagu ovog rješenja prestaje da važi Rješenje o uslovima pod kojim preduzeća mogu dio prihoda ostvarivati u stranim sredstvima plaćanja i robe i usluge koje se ne mogu prodavati i kupovati za strana sredstva plaćanja ("Službeni list RBiH", broj 29/94).

9. Ovo rješenje stupa na snagu danom objavljivanja u "Službenom listu RBiH".

Broj 01-021-2339/95

23. marta 1995. godine

Sarajevo

Zamjenik ministra

dr Izudin Kešetović, s. r.

154

Na osnovu člana 11. stav 3. Zakona o finansijskom poslovanju ("Službeni list RBiH", broj 5/95), ministar finansija, donosi

NAREDBU

O PLAĆANJU GOTOVIM NOVCEM

1. Ovom naredbom bliže se propisuju uslovi i način naplate prodatih proizvoda i usluga u gotovom novcu (domaća i strana valuta), raspolaganje i plaćanje gotovim novcem.

2. Pravno lice iz člana 1. Zakona o finansijskom poslovanju i člana 3. Zakona o unutrašnjem platnom prometu ("Službeni list RBiH", broj 5/95) naplatu prodatih proizvoda, izvršenih usluga i potraživanja po drugim osnovama od pravnih lica obavlja preko računa kod Zavoda za platni promet (u daljem tekstu: Zavod).

Izuzetno od odredbe stava 1. ove tačke pravno lice naplatu prodatih proizvoda, izvršenih usluga i potraživanja po drugim osnovama od pravnih lica može vršiti u gotovom novcu na način i do visine utvrđene ovom naredbom.

3. O izvršenoj naplati prodatih proizvoda, izvršenih usluga i potraživanja po drugim osnovama u gotovom novcu pravno lice dužno je izdati odgovarajuću ispravu (priznanica, ovjeren račun i dr.).

4. Pravno lice iz člana 10. stav 2. Zakona o finansijskom poslovanju, ako je solventno, može plaćati gotovim novcem koji potiče od dnevnog pazara i ostalih primanja u gotovu, s tim što je dužno da te isplate obračuna sa nadležnom jedinicom Zavoda prilikom narednog uplaćivanja gotovog novca na račun.

5. Pravno lice podiže gotov novac sa računa koji se vode kod Zavoda radi isplata u gotovu i za održavanje visine blagajničkog maksimuma u skladu sa ovom naredbom.

6. Pravno lice može držati u svojoj blagajni gotov novac za gotovinska plaćanja do visine blagajničkog maksimuma posebno za blagajnu domaće valute, a posebno za deviznu blagajnu.

Visinu blagajničkog maksimuma iz stava 1. ove tačke pravno lice utvrđuje zavisno od visine i vrste isplata u gotovom novcu koje vrše prema prirodi svog poslovanja, udaljenosti od sjedišta nadležne jedinice Zavoda i drugih uslova koji su od uticaja na potrebu držanja gotovog novca u blagajni.

U blagajnički maksimum ne ulazi gotov novac podignut namjenski sa računa za plaćanje iz tačke 7. ove naredbe osim iz podtačke 4), pod uslovom da pravno lice novac za ta plaćanja ne drži u svojoj blagajni duže od pet dana od dana podizanja.

7. Pravna lica i samostalni privrednici mogu plaćati gotovim novcem:

1) plate i druga lična primanja ukoliko se isplata ne vrši putem tekućih računa i štednih knjižica;

2) poljoprivredne proizvode i sekundarne sirovine otkupljene, odnosno preuzete od zemljoradnika i građana;

3) akontacije putnih troškova i dnevnica, kao i putni troškovi i dnevnice u zemlji;

4) proizvode, usluge i druge obaveze pravnim licima, ako pojedinačna isplata nije veća od 100 DEM i u dinarskoj protuvrijednosti po kursu Narodne banke BiH na dan plaćanja;

5) isplate za potrebe odbrane i humanitarne djelatnosti, usluge prevoza stranih špeditera i drugih špediterskih troškova ukoliko se radi o stranim fizičkim licima. Ove isplate će se vršiti gotovinski dok traje ratno stanje, odnosno do uspostave platnog prometa na cijelom teritoriju Republike;

6) druge isplate građanima koja u smislu drugih propisa nisu obavezni da imaju žiro račun.

Pravna lica i samostalni privrednici koji žele podići gotov novac za plaćanje obaveza iz podtačke 2) i 5) ove tačke su obavezni nalog za podizanje gotovine ovjeriti kod nadležne Finansijske policije, odnosno obezbijediti kopiju naloga.

8. Gotov novac primljen po osnovu vršenja bankarskih i kreditnih poslova banaka i drugih finansijskih organizacija može koristiti za isplate po tim osnovama i držati u blagajni do visine blagajničkog maksimuma. Visinu blagajničkog maksimuma, posebno u domaćoj a posebno u stranoj valuti za ove namjene, banka odnosno finansijska organizacija utvrđuje zavisno od visine i vrste isplata u gotovom novcu koje vrši u obavljanju kreditnih i bankarskih poslova, udaljenosti od sjedišta nadležne jedinice Zavoda kod koje ima račun i drugih uslova koji su od uticaja za potrebu držanja gotovog novca u blagajni.

Gotov novac za namjene iz stava 1. ove tačke banka, odnosno druga finansijska organizacija može da podiže i kod nadležne jedinice Zavoda.

Iznos gotovog novca koji prelazi blagajnički maksimum, banka i druga finansijska organizacija uplaćuju na svoje račune u rokovima propisanim u članu 10. Zakona o finansijskom poslovanju.

Poslove iz stava 1. ove tačke, banka i druga finansijska organizacija može da isplaćuje u stranim sredstvima plaćanja pod uslovom da Zakonom o unutrašnjem platnom prometu i propisima donijetim na osnovu tog zakona nije zabranjeno.

9. Lutrija Bosne i Hercegovine, odnosno druga organizacija koja se u skladu sa zakonom ili drugim propisima može baviti organiziranjem igara na sreću (u daljem tekstu: Lutrija), može vršiti isplatu po izvučenim srećkama i drugim potvrđama o učešću u igri na sreću gotovim novcem koji potiče od dnevnog pazara od prodaje srećaka i tih potvrda, s tim što je dužna izvršiti obračun tih isplata sa nadležnom jedinicom Zavoda jednom mjesečno.

Gotov novac koji potiče od dnevnog pazara, poslije izvršenih isplata iz stava 1. ove tačke Lutrija može držati u blagajni do visine blagajničkog maksimuma. Visinu blagajničkog maksimuma, posebno za domaću a posebno za strana sredstva plaćanja, Lutrija utvrđuje zavisno od visine dnevnog pazara i isplata u gotovom novcu koje vrši po osnovu iz stava 1. ove tačke.

Gotov novac za namjene iz stava 1. ove tačke Lutrija može da podiže i kod nadležne jedinice Zavoda.

10. Blagajnički maksimum, utvrđuje se na početku godine za tekuću godinu posebno za plaćanje u gotovom preko blagajne domaće valute, a posebno za plaćanje u gotovom preko devizne blagajne. Blagajnički maksimum se podnosi Zavodu.

Izuzetno, blagajnički maksimum za 1995. godinu pravno lice će utvrditi i predati, odnosno obavijestiti Zavod u roku od 15 dana od dana stupanja na snagu ove naredbe.

Pravno lice može u toku godine da poveća, odnosno smanji blagajnički maksimum, ako se izmjene uslovi na osnovu kojih je utvrđen.

11. Za neprovođenje radnji iz ove naredbe primjenjivat će se kaznene odredbe utvrđene u Zakonu o finansijskom poslovanju ("Službeni list RBiH", broj 5/95).

12. Danom stupanja na snagu ove naredbe prestaje da važi Naredba o uslovima i načinu naplate, raspolaganja i plaćanja gotovim novcem ("Službeni list RBiH", broj 36/94).

13. Ova naredba stupa na snagu danom objavljivanja u "Službenom listu RBiH".

Broj 01-021-2339/95

27. marta 1995. godine
Sarajevo

Zamjenik ministra
dr Izudin Kešetović, s. r.

Po izvršenom savjetovanju sa izvornim tekstom, utvrđeno je da se u tekstu Odluke o izboru sudija porotnika Okružnog vojnog suda u Tuzli ("Službeni list RBiH", broj 5/95), potkrala niže navedena greška tehničke prirode, pa se daje

ISPRAVKA ODLUKE O IZBORU SUDIJA POROTNIKA OKRUŽNOG VOJNOG SUDA U TUZLI

- U rednom broju 1. umjesto prezimena "Kontić", treba da stoji Kantić.

- U rednom broju 3. umjesto prezimena "Brucec" treba da stoji Brumec.

- U rednom broju 4. umjesto imena "Suda" treba da stoji Suad.

Broj 02-111-170/95
4. aprila 1995. godine
Sarajevo

Zamjenik generalnog sekretara
Predsjedništva RBiH,
Alija Selimović, s. r.

Državni zavod za statistiku

Na osnovu člana 8. Uredbe sa zakonskom snagom o porezu na plaću ("Službeni list RBiH", broj 5/95), Državni zavod za statistiku Republike Bosne i Hercegovine, objavljuje

SAOPŠTENJE - SAOPĆENJE O PROSJEČNOJ BRUTO PLAĆI ZAPOSLENIH U REPUBLICI BiH ZA JANUAR/SIJEČANJ 1995. GODINE

1. Prosječna bruto plaća po radniku u Republici Bosni i Hercegovini za mjesec januar/siječanj 1995. godine iznosi 5869 BHD.

2. Prosječna bruto plaća po radniku u privredi Republike Bosne i Hercegovine za mjesec januar/siječanj 1995. godine iznosi 5392 BHD.

3. Prosječna bruto plaća po radniku u vanprivredi Republike Bosne i Hercegovine za mjesec januar/siječanj iznosi 7423 BHD.

Broj 38
5. aprila 1995. godine
Sarajevo

Direktor
dr Hasan Zolić, s. r.

OGLAS

NIO Službeni list R BiH Sarajevo o b j a v l j u j e

OGLAS

za popunu upražnjenih radnih mjesta

1. TEHNIČKOG UREDNIKA 1 izvršilac

USLOVI: visoka stručna sprema društvenog ili tehničkog smjera sa najmanje 1 godinom radnog iskustva na poslovima urednika ili lektora u novinsko-izdavačkim organizacijama i poznavanjem hrvatskog jezika

2. KOREKTORA 2 izvršioca

USLOVI: Završen Filozofski fakultet ili Pedagoška akademija sa poznavanjem bosanskog odnosno hrvatskog jezika sa najmanje 1 godinom radnog iskustva na poslovima lektora ili korektora u novinsko-izdavačkim organizacijama.

Za sve kandidate pod 1. i pod 2. obavezno poznavanje kompjuterske obrade teksta (stono izdavaštvo-DTP).

Izbor kandidata izvršit će se na osnovu pokazanih rezultata poznavanja kompjuterske obrade teksta i obavljenog usmenog testa o ispunjavanju opštih i posebnih uslova za odgovarajuće radno mjesto po ovom oglasu.

Prijave sa kraćim biografskim podacima i dokazima o ispunjavanju uslova mogu se podnositi NIO Službenom listu R BiH - Sarajevo, ulica Magribija br. 3. ili u Poslovnici ulica Malta br. 21. u roku od 15 dana od dana objavljivanja u "Službenom listu R BiH", Sarajevo.

SADRŽAJ

143 Odluka o razrješenju i izboru predsjednika i sudija redovnih sudova	301	151 Odluka o visini kamate na iznos poreza na promet proizvoda i usluga koji nije plaćen u propisanom roku	305
144 Odluka o razrješenju zamjenika republičkog javnog tužioca i imenovanju zamjenika osnovnih javnih tužilaca	301	152 Odluka o visini kamate na iznos carine i drugih uvoznih dažbina koje nisu plaćene u propisanom roku	305
145 Odluka o izboru sudija u okružnim vojnim sudovima	301	153 Rješenje o vrstama roba i usluga koje se ne mogu prodavati za strana sredstva plaćanja	306
146 Odluka o potvrđivanju odluka kao opštih akata koje je Predsjedništvo R BiH donijelo u funkciji Skupštine R BiH	302	154 Naredba o plaćanju gotovim novcem	306
147 Odluka o osnivanju Interparlamentarne grupe Bosne i Hercegovine i o imenovanju funkcionera u Interparlamentarnoj grupi Bosne i Hercegovine	302	Ispravka Odluke o izboru sudija porotnika Okružnog vojnog suda u Tuzli	307
148 Odluka o ciljevima i zadacima devizne politike i projekciji platnog bilansa u 1995. godini	303	DRŽAVNI ZAVOD ZA STATISTIKU	
149 Odluka o ciljevima i zadacima monetarno-kreditne politike u 1995. godini	304	Saopštenje - saopćenje o prosječnoj bruto plaći zaposlenih u Republici BiH za januar/siječanj 1995. godine	307
150 Odluka o određivanju robe na koju se ne plaća naknada za carinsko evidentiranje	305		

Izdavač: Novinsko-izdavačka organizacija Službeni list R BiH - Sarajevo, Ulica Magribija 3 - Poštanski fah 3 - Direktor i odgovorni urednik Mehmedalija Huremović - Telefoni - direktor: 663-470, fax 663-470 - Redakcija i Pretplata: 663-471 - Računovodstvo: 651-257 - Poslovnica, Malta 21, telefon 657-441 - Akontacija pretplate se utvrđuje kvartalno, a uplata se vrši UNAPRIJED u korist računa: 10100-603-1396 za dinarsko poslovanje i računa: 10100-603-639 za devizno poslovanje - Kompjuterska obrada: NIO Službeni list R BiH Sarajevo - Štampa: »OKO« dd sa p. o. Sarajevo - Za štampariju Rasim Rapa - Reklamacije za neprimljene brojeve primaju se 20 dana od izlaska lista.

Prema mišljenju Ministarstva obrazovanja, nauke, kulture i sporta broj: 08-114-4/95 od 13. 3. 1995. godine, službeno glasilo smatra se proizvodom iz člana 19. stav 1. tačka 12. Zakona o porezu na promet proizvoda i usluga, za koje se ne plaća porez na promet proizvoda, a po mišljenju Ministarstva finansija broj 05-021-1768/95 od 28. 3. 1995. godine, prodaja službenog glasila po Tarifi tačka 1. Napomene ne spada u prodaju proizvoda koji služe krajnjoj ličnoj potrošnji, te ne podliježe plaćanju poreza trgovine na malo.